



無共樣个頭路

寮暑假係學生仔最暢樂个時節，過知好打算个人，會好好利用暑假去學兜技術，加強自家个能力，考著一兩張以後用得著个證照。係無，兩隻零月恁長个時間，會搞到毋知人哦！

對畢業無愛過升學个人來講，這個暑假就係愛開始愁慮尋頭路个時節也。你想愛尋仰仔个頭路？薪水高、事頭少、離屋下近？同自家興趣接近、安全有保障个頭路，係大部分人个夢想。

有兜頭路，同佢等一般看著个無共樣，下背來紹介幾個過特別、過少聽過个頭路：

尖公車、捷運蓋多人个時節，鼻著別人个臭汗酸味，你會佇毋著無？天時熱流汗出來又有細菌繁殖，造成有兜人圓身个氣味盡重，佢等也蓋煩惱。有一種頭路就係專門鼻人下肢咯个鑑識員，判斷每一個人流汗个氣味同程度，這兜資料做得分科學家研究，看哪試仰仔正毋會分別人鼻著汗酸味。

流汗地洗身應該會過鬆爽。人愛洗身、動物愛洗身，佢等駛个車仔厠糟地也會洗洗啊。嘎天頂項飛个飛行機喎？有人个頭路就係同飛行機洗身，飛行機忒多塵灰會變過重，會浪費油，故所一站仔就愛去洗身。有幾下十個人跋上跋下，還愛像消防隊坐雲梯車到六層樓高沖水，將飛行機洗淨來。

排隊係有規矩个好習慣，毋過，愛搶買有紀念性个東西、演唱會門票，抑係愛去病院掛號，淦淦个人在該排隊分你看著就腳軟！有一種頭路盡簡單，就係代你去排隊，毋管日頭烈抑係落雨浙濟，佢定著會完成你交代个事頭。

愛設計電動玩具个程式有兜仔困難，搞電動玩具應該就過簡單也，而且係盡多後生仔本來就盡愛搞也。因爭設計程式个公司也想愛知新个遊戲出來，有麼个缺點無？大家人歡迎無？故所愛有人先試搞過，將發現个问题解決。

三百六十行，行行出狀元。這兜同人無共樣个頭路，會錫你無？

作者：吳秀梅

☆詞彙學習☆

【事頭】se teuˊ：工作。

【厠糟】oˊ zoˊ：骯髒。

【臭汗酸味】cu hon sonˊ mi：汗臭味。

【一站仔】idˊ zamˊ eˊ：一陣子。

【下肢咯】haˊ ji gud：胳肢窩。

【淦淦】nemˊ nemˊ：滿滿的。

【鬆爽】sungˊ songˊ：輕鬆爽快。

【落雨浙濟】log iˊ zab ze：大雨泥濘的樣子。

☆文法學習☆

【過特別】go tid pied：比較特別。「過」有許多意義與用法，在此處為「比較、較為」之意。後方接形容詞，用於比較的句式中，如文中的「過少（比較少）、過重（比較重）、過鬆爽（比較舒爽）、過簡單（比較簡單）」等。